

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 25.10.2012 18.05 Uhr auf 94.0 bzw. 87,7

Leev Toehörers,

as ik lesd Sönndag tegen halv dree mit mien Jung Rolf, mien Schwegerdochter Jessica un mit mien Enkelin Sharina up de Parkplatz achter dat Kickershuus fahren bün, was ik doch enttäuscht, dat bold keen Autos dor parkten. Do hebb ik al docht, dat wor weer nix mit 'n Bült Toekiekers. Un so is dat ok komen, blot 250 hebben de Weg in de Oostfriesland-Stadion funnen. Worum Pesem (Pewsum) toe glieke Tied ok spölte, is mi 'n Raadsel. Worum können de, de de Spölplanen maken, dat neet beter henkriegen, fraag ik mi. Hier mutt van Kickerssied wat unnernomen worden, dormit dat in de komende Spöltied – of al in de Rückserie – neet mehr passert, meen ik.

Man nu toe dat Spöl van Kickers Emden tegen de SSC Dodesheide, de Kickers na 'n heel spannend Spöl – vör allen toe 't Schluss – mit Glück un Könen mit 3:2 wunnen hett. Dat was aber keen Spöl vör schwacke Nerven. Dat Spöl harr ok heel un dall anners utgahn kunn. In de 14. Menüte gung de heel fell Middelstörmer **Tim Stein** van Dodesheide up de linke Kant dör, gung in de Straafruum, wor hum **Ayaovi Bamezon**, van de Benen broch. Dor gaff dat nix. De Schiri **Jurjen Kaper**, 'n Hollander, gaff Elfmeter. **Niklas Poerschke** skoot, man Kickers-Torwart **René Carsten** smeeet sük in de richtige recht Eck un hull de Ball.

Blot 'n paar Menüten later gung dorför Kickers Emden in Föhren. Een hart lang Skoet van **Denis Alexandrenko** kunn Torwart **Marcus Dieckmann** neet fasthollen un **Sebastian Bloem** kunn de Ball in 't Nett unnerbringen.

Söven Menüten later, in de 25. Menüte. gaff **Gökay Batbay** van de recht Kant 'n Flank vör 't Tor. **Tido Steffens** truff de Ball neet so recht, man an de 2. Posten was weer Bloem dor un dönnerte de Ball toe dat 2:0 in 't Tor.

Disse Föhren sullte egentlik Sekerheid geven. Man nix dorvan. Dodesheide kwamm up! Na 'n moi Flanke van de recht Kant skoot Tim Stein, för mi de beste Spöler van Dodesheide, de Ball direkt in 't Tor van Kickers. Was 'n moi Tor een Menüte för de Halvtiedpaus, dat mutt man – ok as Fan van Kickers Emden - toegeven.

Bi de Pausentee hett de Ersatztrainer van Dodesheide, **Holger Karp**, sien Mannskupp wall ördentlik Beskeed seggt. Toe Anfang van de 2. Halvtied harr de Gast de best Tied, he drückte un harr groot Kansen. Man de Ofwehr van Kickers Emden stunn. Man na goed 'n Vördelstünn kwamm Kickers weer. Na 'n Ecke verlängerte **Tido Tuityer** de Ball mit de Kopp, un Bamezon kunn mit 'n moi Koppball dat dart Tor vör Kickers sketen. Man de Tweetorenföhren dürs blot 'nm paar Menüten. No 'n Freetrapp sprungen all Kickersspölers in de Mür hoog un de skarp skotende Ball gung in 't Tor van Kickers.

Dorna gung dat in beid Straafrumen deelwies hoog her. Ok wurr Bült Foul spölt. Kickers Emdens Torwart Carsten gung na 'n Toesamenprall mit 'n Dodesheimer Spöler an de Grund. De Ball smeeet he noch in 't Ut. As dat Spöl na 'n paar Menüten weer anfleit wurr, dochen all, dat de Dodesheimer de Ball, so as man dat allgemeen maakt, an Kickers toerüggspölte. Man nix dorvan, de hullen de Ball un harren dordör bold 'n Tor maakt. Dorover was Carstens so düll, dat dat na 't Spöl bold 'n Hauereei geven harr. Ok de Dodesheimer Torwart Dieckmann mischte dor goed mit. Trainer **Turan** mook dat eentigst richtige, er stürte all Spölers toe 't Utlopen up de Reis, dormit disse sük ofreageren denen..

Kickers Emden spölt Saterdag um Klock 6 in Lohne. Kickersfan **Kurrat** ut Dortmund schrifft dortoe in de Fan-Forum van Kickers, dat man dat Spöl wall extra so leggt hett, wall in de Vereinshuus van Lohne in de Kiekkast up Sky keen Bundesliga-Abendspöl wesen worden kunn un man dorum de 1. Mannskupp in disse Tied spölen lett. Ik mutt seggen, 'n rege Fantasie hebben eenige Fans van Kickers Emden ja al immer hat. Ik tipp up 'n 1:1 Saterdag in Lohne. Hoop dorbi, dat **Bernd Grotlüschen** weer uplopen kann. De fehlt an all Ecken un Ennen. So, as alltied, noch kört Foetballwitz:

Worum hebben de Hollanders so lang Ohren?

Se wurren an de Ohren hoogtrucken un hebben dann seggt bekommen: „Kiek, dor an anner Kant van de Grenz wohnt de Foetballweltmeister!“

Leev Toehörers van Radio Oostfreesland,
dat was dat weer maal för disse Week.

Ik hoop, Joe hett dat Plattdütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.